



Extrait de la revue **SingulierS** du 3^{ème} trimestre 2005

Revue des parlers romans de la province de Luxembourg

Editeur responsable: P. Otjacques, rue de la Hette 19 - 6840 Neufchâteau

Rubrique : Textes

Lès fèyes asteûre...

Léon GILLET

(gaumais de Saint-Léger)

Lès fèyes asteûre s' fayant roti ô slo,
Vulant ête nwâres coume la croûte dès mitchos
Pus ça èst nwâr, pus èles su croyant bèles,
Nu counichant pus la hâlète ni l' ombrèle.

Lès fèyes asteûre su vîtant coume dès djônes djans,
An dèrot pa dès côps dès canvolants
Pus c' èst niche, pus c' èst dèchèrèy, a lokes,
Èles s' a foutant, n' émant pus lès bèles cotes.

Lès fèyes asteûre, s' barbouyant la binète
Avu don nwâr, don roudje, in pô d' violèt,
S' tindant lès tchveûs du toutes lès couleûrs,
Èles pièrdant leû djônèsse, leû frêcheûr.

Lès fèyes asteûre, feumant coume dès démons,
Chouflant la feuméye a fayant dès ronds,
Distilant a grandes gouléyes lu cancêr,
Èles avant ine alône du grand pére.

Lès fèyes asteûre nu savant pus dansi
S' torticolant, n' savant oû mète lès pîds,
S' acrotchant fèrme ô cô dès jigolos
Èles nu counichant ni la valse, ni l' tango.

Si nos grand méres ruvnint, èles nous dèrint :
– Vos djônes fèyes, c' èst ça ! Dès vrâes propes a rin.
Rapernez lès dan a ête naturèles
Èles î guégn'rant, èles srant çant côps pus bèles.

Malêjis mots :

alône = haleine. / **couniche** = connaître. / **cote** = robe. / **fèye** = fille. / **hâlète** = coiffe contre le soleil. / **mitchot** = petit pain. / **piède** = perdre. / **slo** = soleil. / **vîti** = vêtir. / **vrâ** = vrai.